



## Komunikadu Imprensa RAEOA

### **JSMP fasilita treinamentu tráfiku umanu no violénsia bazeia ba jéneru iha Suku Nipane, Postu Adminsitrativu Pante-Makasar, Rejiaun Administrativa Espesial Oekusi-Ambeno (RAEOA)**

Iha 04 to'o 07 Setembru 2023, JSMP kontinua halo treinamentu kona-ba Tráfiku Umanu no Violénsia Bazeia ba Jéneru iha Suku Nipane, Postu Administrativu Pante-Makasar, Rejiaun Administrativa Espesiál Oekusi-Ambeno (RAEOA).

Treinamentu ne'e ho objetivu atu kapasita no hasa'e koñesimentu mobilizadór no líder comunidade sira nian kona-ba krime tráfiku umanu no violénsia bazeia ba jéneru (VBJ) no oinsá atu halo prevensaun no ajuda vítima sira bainhira akontese krime sira ne'e iha comunidade nia leet," dehan Sra. Ana Paula Marçal, Diretora Ezekutiva JSMP.

Treinamentu ne'e ofisialmente loke husi Xefe Suku Nipane, Sr. Pedro Sila Eco no Diretora Ezekutiva JSMP Sra. Ana Paula Marçal.

Iha abertura, Diretóra Ezekutiva JSMP agradese tebes ba Xefe Suku Nipane no Mobilizadór JSMP ba Suku Nipane tanba bele organiza ona partisipante sira mai tuir treinamentu ne'e. Prezensa JSMP nian iha Suku Nipane ne'e atu fahe informasaun kona-ba krime tráfiku umanu no prepara *focal point* ka pontu fokál ba kampaña tráfiku umanu tuir mai.

Alende ne'e, diretora salienta liután katak, JSMP identifika suku haat atu sai hanesan pilotu ba projetu ida ne'e. Suku sira ne'e mak hanesan Suku Comoro, Munisípiu Dili, Suku Batugade, Munisípiu Bobonaro, Suku Beiseuc, Munisípiu Covalima no Suku Nipane iha Rejiaun Adminsitrativu Oekuse. JSMP identifika suku sira ne'e sai hanesan tarjéitu tanba suku sira ne'e maioria iha liña fronteira no sira nia comunidade sai risku ba iha krime tráfiku umanu. Diretora mós husu ba partisipante sira atu tuir formasaun durante loron haat ne'e ho di'ak no kompletu nune'e bele hatene informasaun sira tanba suku haat ne'e iha potencialidade boot ba iha krime tráfiku umanu.

Iha intervensaun Sr. Pedro Sila Eco nu'udar Xefe Suku Nipane, agradese tebes ba iha diretora no ekipa husi JSMP ne'ebé identifika Suku Nipane sai mós hanesan pilotu ba formasaun/treinamentu krime tráfiku umanu. Xefe suku haktuir katak informasaun kona-ba VBJ no tráfiku umanu ne'e importante tebes ba comunidade Suku Nipane. Nune'e mós xefe

Rua Beco Lakateu, Aldeia Manu fuiu,  
Suku Colmera, Administrativu Vera Cruz  
Dili Timor Leste

PoBox: 275

Telefone: 3323883 | 77040735

[www.jsmp.tl](http://www.jsmp.tl)

[info@jsmp.tl](mailto:info@jsmp.tl)

Facebook: [www.facebook.com/timorleste.jsmp](https://www.facebook.com/timorleste.jsmp)

Twitter: @JSMPtl

suku Nipane husu ba partisipante sira atu partisipa ho di'ak no kompletu durante loron haat ne'e husi fasilitadór/treinador/a sira nune'e bele hatene kona-ba krime tráfikú umanu no bele evita no halo prevensaun bainhira akontese krime ne'e.

Durante loron haat (4) ne'e partisipante sira agradese tebes tanba depoisde rona tiha apresentasaun, sira konsidera matéria ne'e foun ba sira no hafanu sira hodi tenke kuidadu-an iha futuru tanba sira rekoñese katak iha joven balun ne'ebé ema mai bosok ba serbisu iha sidade maibé ikus ba halo fali atividade prostituisaun.

Iha sesaun diskusaun kona-ba tráfikú umanu no VBJ no asesu ba justisa formál, partisipante sira halo diskusaun no halo apresentasaun. Husi apresentasaun ne'e, JSMP nota katak partisipante sira hahú iha ona koñesimentu kona-ba oinsá indentifika kazu tráfikú umanu no kazu VBJ. Iha diskusaun grupu ne'e mós partisipante sira apresenta sira nia komentáriu no preokupasaun sira kona-ba kazu violénsia doméstika ida tribunál la fó kondenasau tanba arguida moras mentál.

Hatan mós ba preokupasaun sira kona-ba arguida la hatena kondenasau tanba moras mentál, JSMP esplika katak tuir Kódigu Penál, provizaun artigu 21 prevee katak ema sira ho kondisaun moras mentál sei la hetan kastigu bainhira halo krime ruma tanba tuir lei nia kapasidade atu hatene kona-ba hahalok ne'ebé nia halo no lahatene rezultadu saida mak atu mosu husi nia hahalok ne'e. Tanba ne'e, ema sira moras mentál kuandu halo krime, prosesu julgamentu bele la'o maibé desizaun sei haruka ema ne'e ba halo tratamentu iha sentru tratamentu nian atu kura nia moras ne'e.

Alende kestaun sira iha leten, fasilitadór sira mós esplika hikas kestaun balun ne'ebé hato'o husi partisipante sira iha Suku Batugade no Beiseuc kona-ba iha possibilidade tráfikú umanu bele akontese iha família, aktu serbisu forsada, serbisu doméstika no imigrasaun ilegál.

Iha komentáriu, partisipante sira haktuir katak ho matéria sira ne'ebé fornese husi fasilitadór sira durante aumeta ona sira nia koñsesimentu kona-ba violénsia bazeia ba jéneru, tráfikú umanu no oinsa halo prevensaun no fo tulun ba vítima karik akontese kazu ruma.

Treinamentu loron haat (4) ne'e inserta ofisialmente husi Sr. Pedro Sila Eco nu'udar Xefe Suku Nipane. Iha enseramentu ne'e, Xefe Suku agradese tebes ba JSMP tanba matéria sira ne'ebé mak hetan iha treinamentu ne'e importante no esensial tebes ba nia comunidade liuliu matéria kona-ba tráfikú umanu tanba Suku Nipane iha kedan área fronteira ne'ebé ho risku krime hirak ne'e bele akontese iha kualkér tempu. Nune'e husik ba mobilizadór sira atu fahe tutan informasaun ne'ebé hetan iha treinamentu ne'e ba comunidade sira ne'ebé la partisipa iha treinamentu ne'e.

Partisipante sira ne'ebé partisipa iha treinamentu ne'e mai hosi, estrutura suku hanesan xefe suku, xefe aldeia sira, delegadu/a, juventude sira, ema ho defisiénsia, PRADET, lider relijioza ida husi relijiaun Katóliku no, OPS no comunidade sira ho total hamutuk ema na'in 32, ne'ebé

kompostu husi feto 18 no mane 14. Husi feto 18 ne'e iha feto defisiénsia na'in rua no husi mane 14 iha defisiénsia na'in ida.

Treinamentu ne'e realiza ho apoiu finanseiru husi Governu Timor-Leste, Ministériu Interiór ne'ebé diretamente jere husi ajénsia Nasoins Unidas UN Women.

Atu hetan informasaun kompleitu, favór kontaktu:

Ana Paula Marçal

Diretora Ezekutiva JSMP

Diresaun e-mail: [ana@jsmp.tl](mailto:ana@jsmp.tl)

Telefone: (+670) 33238883 | 77040735

Website: <https://jsmp.tl>

[info@jsmp.tl](mailto:info@jsmp.tl)